

四庫全書

經部

欽定四庫全書

書蔡氏傳旁通卷四上
元 陳師凱 撰

泰誓上

周文王國號後武王因以爲有天下之號

史記后稷封於郃公劉子慶節國於豳古公亶父止
於岐下徐廣曰山在扶風美陽縣西北其南有周原
皇甫謐云邑於周地故始改國曰周愚按周室王業
之興始於太王大於文王成於武王故蔡氏截自文

王言之耳古公即太王也詩言太王實始翦商是也
邠在今鳳翔府扶風縣豳在今邠州岐山在今鳳翔
府岐山縣史記云故周城一名美陽城在雍州武功
縣西北即太王城也武功今屬乾州又按文王作豐
邑自岐下徙都豐武王徙都鎬在今奉元路鄠縣奉
元古京兆也

伏生二十八篇本無泰誓武帝時僞泰誓出與伏生今
文書合爲二十九篇

釋文序錄云漢宣帝本始中河內女子得泰誓一篇獻之此云武帝時者據注疏云司馬遷在武帝之世已見泰誓云宣帝時女子所得不可信故蔡氏不從之疏又云宣帝泰和元年河內有女子壞老子屋得古泰誓三篇然宣帝無泰和年號恐本始之誤

十三年者武王即位之十三年也

或問伯夷叩馬之諫有父死不葬爰及干戈之說則

於蔡傳不能無疑豈有十三年而不葬其父者乎愚
曰不然太史公之妄耳伯夷聞西伯善養老久與太
公同歸之聖人遂事不說伯夷獨不能諫之於平日
而乃卒然發於事不可已之時乎孟津之會文王之
葬久矣故知叩馬之諫必無此事也

漢孔氏言虞芮質成爲文王受命改元之年

疏云詩云虞芮質厥成毛傳稱天下聞虞芮之訟息
歸周者四十餘國故知周自虞芮質成諸侯並附以

爲受命之年

合爲十有三年

疏云知此十一年非武王即位之年者大戴禮云文王十五而生武王則武王少文王十四歲也禮記文王世子云文王九十七而終武王九十三而終計其終年文王崩時武王已八十三矣八十四即位而九十三崩適滿十年不得以十三年伐紂知此十一年者據文王受命而數之必繼文王年者爲其卒父業

故也

夫改正朔不改月數於太甲辨之詳矣而四時改易尤爲無藝

三代有正朔有正月正月皆以寅起數是爲孟春之月百王之不易者也正朔者又謂之正歲商用十二月即建丑月也周用十一月即建子月也前此諸儒分別未明故有紛紛之論然謂之不改月數謂之改月數則皆有據且所以證改月者如左氏僖五年正

月辛亥朔日南至昭二十年二月己丑日南至夫南至即建子月也而左氏見之正月二月孟子言七八月之間旱則苗槁矣朱子謂周七八月夏五六月也又禮記云正月日至可以有事於上帝七月日至可以有事於祖凡此皆足以爲改月數之驗其不改者則如蔡氏之所引然七月篇云十月蟋蟀入我牀下曰爲改歲朱子引東萊呂氏云三正之通於民俗尚矣周特舉而迭用之故朱子每隨文解之於改月不

改月迄無定說惟蔡氏立說甚確又按古周書周月篇云維一月既南至日短極是月斗柄建子又云四時成歲歲有春夏秋冬夏各有孟仲季以名十有二月又云夏數得天百王所同愚謂正月則以寅起數所謂百王所同也其正朔則各不同惟朝覲會同用之其農事自依夏正也考之經傳又似東周以來始有以子月起數者恐末世國異政之所爲在東周之前固無之讀是書者自當以蔡傳爲正不必爲他書所

惑也

同力度德同德度義意古者兵志之詞

輯纂引林氏云凡勝負之理力同則有德者勝德同則有義者勝度德校善惡也度義校曲直也

百萬曰億

輯纂引余氏云此謂百萬曰億洛誥訓十萬曰億新安陳氏曰韋昭注楚語云十萬曰億古數也秦改以萬萬爲億今解尚書合主十萬爲億之說百萬爲億

未見所本

貫通盈滿也

唐孔氏曰紂之惡如繩貫物其貫已滿

冢土太社也祭社曰宜

冢訓太社土神也故知冢土爲太社孫炎爾雅注云
宜者宜求見福佑也

秦誓中

次止徇循也

疏云左氏莊三年傳云凡師一宿爲舍再宿爲信過
信爲次此次字直取止舍之義非左氏三日之例也
何則商郊去河四百餘里戊午渡河甲子殺紂相去
六日耳是今日次訖又誓明日誓訖即行不容三日
止于河旁也徇者說文云徇疾也循行也徇是疾行
之意故以徇爲循也一說取撫循師旅之義

戊午以武成考之是一月二十八日

一月武成傳是建寅月所以知戊午爲二十八日者

以武成云惟一月壬辰旁死魄旁死魄爲初二日則此月朔辛卯也數至戊午可知

周都豐鎬其地在西

韻會云豐在京兆杜陵西南鎬在上林苑中豐東二十五里今並在陝西奉元路

古者去國爲喪

朱子云喪失位去國也

元良微子也

知爲微子者以殷王元子長且賢而又去之周也

諫輔比干也

知爲比干者以剖心爲賊虐之事也

知伐商而必勝之

輯纂引胡氏曰按蔡傳言伐商以伐訓戎謂以兵戎伐之也林氏曰戎大也如曰殪戎殷曰變伐大商愚按康誥傳云乃大命文王殪滅大殷是以戎訓大也而此訓伐者蓋本孔傳云以兵誅紂必克之占䟽云

訓戎爲兵是以兵誅紂也

亂臣十人

據孔疏云謂先儒鄭元等皆云然

文母邑姜

文母文王正妃是爲太姒邑姜武王后也

武王弔民伐罪於湯之心爲益明白於天下也

于湯有光此光字屬成湯非武王尤光於成湯也故蔡傳云湯之心爲益明白又云湯之心驗之武而益

顯武王弔伐所以有光於湯者蓋言成湯公天下之心經六百年其慙未解至武王而始得明白如云在今日爲他發潛德之幽光耳非武王之夸辭也

泰誓下

天子六軍大國三軍是時武王未備六軍牧誓叙三卿可見此曰六師者史臣之詞也

周禮云萬二千五百人爲軍王六軍大國三軍次國二軍小國一軍軍將皆命卿二千五百人爲師師帥

皆中大夫五百人爲旅旅帥皆下大夫百人爲卒卒
長皆上士二十五人爲兩兩司馬皆中士五人爲伍
伍皆有長愚按天子之國六卿出正軍七萬五千人
六遂出副軍亦七萬五千人司馬法十井八十家共
出車一乘一乘計七十五人內甲士三人步卒七十
二人萬井八萬家合出車千乘甲士三千人步卒七
萬二千人其時武王未立六鄉六遂之制不應先爲
六軍且孟子言武王之伐殷也革車三百兩亦不合

六軍兵車之數牧誓止言司徒司馬司空每一卿爲一軍將合三萬七千五百人該車五百乘孟子止言三百兩者蓋兵士雖有三軍之數而其兵車尚闕二百乘以見聖人之不恃力也如此然此經文言大巡六師周禮以二千五百人爲師則是六師共一萬五千人蔡氏不以此訓者明知一萬五千人上不合大國三軍之數下不合小國一軍之文文王武王相繼爲西伯今日大舉必不止一萬五千人也故直以六

師爲六軍武王雖敵紂其時未備天子之制不應有六軍且有牧誓三卿爲質故以爲史臣之詞也以三百計之爲二萬二千五百人孔疏不計甲士三人只得二萬一千六百人也

天有至顯之理其義類甚明至顯之理即典常之理也典常之理即仁義禮智信也此皆天理之自然人心之固有謂之顯道猶言明命也天以此命之於人其義類甚明如父子有親仁也君臣有義義也夫婦有

別智也長幼有序禮也朋友有信信也以五性而合之五品之倫義各有當所謂厥類惟彰也斯理斯類出於天而備於人紂乃狎侮荒怠而弗敬焉所以自絕於天而結怨於民也

正士箕子也

知正士爲箕子者經言囚奴正士即箕子爲之奴也郊所以祭天

古者天子於國之南郊築圜丘之壇冬至而祭天

之主宰者是爲昊天上帝於郊故謂之郊

社所以祭地

社土神古天子諸侯於公宮之右爲壇以祭之

淫巧爲過度之巧

淫訓過淫巧過於巧者也

祝斷也

公羊傳哀十四年子路死子曰天祝予何休云祝斷也

殺敵爲果致果爲毅

見左氏傳宣二年

商周之不敵

見左氏傳桓十一年

牧誓

牧地名在朝歌南即今衛州治之南也

衛州今衛輝路也屬河東山西道云在朝歌南又云
州治之南者非朝歌即州治蓋州治正牧野地武王

陳兵在其少南相去不遠而紂都朝歌則在州之東北七十三里是州治在朝歌之南而陳兵又在州治之南也

甲子二月四日也

以一月爲辛卯朔大盡則二月當辛酉朔而甲子在初四

王無自用鉞之理

古注云左手杖鉞示無事於誅右手把旄示有事於

教疏引太公六韜云大柯斧重八斤一名天鉞蔡氏云王無自用鉞之理者以史記言武王以黃鉞斬紂頭此事必非聖人所爲而徒爲武王萬世之累故特於此因左杖之文直書曰王無自用鉞之理以破司馬遷之誣况經無其事乎

司徒司馬司空三卿也武王是時尚爲諸侯故未備六卿

司徒掌教司馬掌兵司空掌事如冢宰宗伯司寇雖

無其人事不可廢蓋三卿兼攝之而不備官也

司徒主民治徒庶之政令司馬主兵治軍旅之誓戒司
空主土治壘壁以營軍

此据注疏蓋專主從軍而言大司徒職曰大軍旅大
田役以旗致萬民而治其徒庶之政令大司馬職曰
羣吏聽誓於陳前斬牲以左右徇陳曰不用命者斬
之周官篇曰司空掌邦土居四民時地利其治壘壁
亦匠人之職也愚按蔡氏以此三卿即爲三軍之將

而孔疏所釋又各掌一事非若軍將之所爲何也蓋
天子六鄉大國三鄉每鄉卿一人統一萬二千五百
家大軍旅則即以爲軍將所謂軍將皆命卿者也蔡
氏於甘誓言之詳矣蓋大國三鄉其三卿率其三軍
之衆而總屬於大司馬大司馬自與司徒司空總治
三軍之事故司徒治徒庶司馬治誓戒司空治營壘
如疏所云也所謂軍將在亞旅之中矣

師氏以兵守門者猶周禮師氏王舉則從者也

周禮師氏云凡祭祀賓客會同喪紀軍旅王舉則從
使其屬帥四夷之隸各以其兵服守王之門外且蹕
朝在野外則守內列愚按此師氏即周禮師氏故古
注及疏皆引以爲說而蔡氏乃曰猶周禮師氏則是
本不同何也蓋周禮乃天子制度武王此時未宜有
此雖設師氏亦未盡如周禮之制故蔡氏以猶字言
之所以著當時之實迹發後世之新義有功於名教
者皆若此然論師氏之職則文武時已有之後來周

公修六典始備天子之制也

千夫長統千人之帥

周之軍制無專統千人者惟有二千五百人爲師師帥皆中大夫故古注以千夫長爲師帥

百夫長統百人之帥

周禮云百人爲卒卒長皆上士蔡氏不據之者以周禮爲天子之制恐不同耳然六軍三軍雖不同而各軍之制自軍將以下至五人爲伍則皆同也

庸濮在江漢之南

寰宇記云房州竹山縣本漢上庸縣古之庸國也今
爲襄陽路支郡羅氏路史國名記云濮熊姓在峽外
爲楚害楚滅之杜預云建寧郡南濮夷地建故縣今
爲鎮隸石首以多曰百濮

羌在西蜀

詩疏云氐羌之種漢世猶存在秦隴之西愚按今之
西和州即故岷州其地亦古西羌地屬鞏昌便宜都

總帥府韻會云後漢光武紀注羌有百五十四種在西蜀者疏云羌在蜀西故云西蜀蘇氏注云羌先零罕丹之屬

髻微在巴蜀

疏云巴在蜀之東偏漢巴郡所治也愚按巴郡今重慶忠州合州涪州萬州等處皆是諸家皆未能詳髻微之所在路史國名記微在扶風郿陽今岐之郿縣有郿鄉即微也

盧彭在西北

疏云在東蜀之西北也蘇氏注盧即左傳羅與盧戎
兩軍之之盧蒙宇記襄陽郡中盧縣春秋盧戎之國
縣今廢輿地要覽云襄陽路周穀鄧鄴盧羅都之地
也蘇氏又云彭今屬武陽有彭山愚按即今眉州彭
山縣也八國惟蜀地後世甚明故古注据以爲向餘
皆難考故蔡氏亦因古注成文解之
牝雞而晨則陰陽反常是爲妖孽

疏云以牝雞之鳴喻婦人知外事

婦妯已也

疏引晉語云殷辛伐有蘇氏以妯已女焉

昆弟先王之胤也紂以昏亂棄其王父母弟而不以道遇之

古注云王父祖之昆弟母弟同母弟惠按紂有同祖之弟又有同母親弟故經言王父母弟同一弟字省文也蔡氏言先王之胤則包之矣疏引爾雅云父之

考爲王父則王父是祖也春秋之例母弟稱弟母弟
謂同母弟也

告之以坐作進退之法

坐作進退大司馬文也車徒皆坐車徒皆作作起也
進車驟徒趨也退鳴鐃且卻也

告之以攻殺擊刺之法

如車三發徒三刺之類

武成

死魄朔也

漢律歷志文也朔日日月相會二象合沓陽上陰下
月體不明故謂之死魄然又謂之朔者朔之爲言蘇
也有死而復蘇之機也正義曰此月辛卯朔朔是死
魄故二日近死魄旁近也朔後明生而魄死望後明
死而魄生

翼明也

輯纂引王氏云翼輔也以此日爲主則明日爲輔翼

此日者故以明日爲翼日

周鎬京也

時武王已遷都於此

即今長安縣昆明池北鎬陂是也

三輔黃圖云鎬池在昆明池之北即周之故都也周
匝二十一里蓋地三十三頃長安縣今屬奉元路即
安西路古京兆也

豐文王舊都即今長安縣西北靈臺豐水之上

三輔黃圖云周文王靈臺在長安西北四十里高二丈周回百二十步豐水出鄠南山豐谷北入渭

桃林今華陰縣潼關也

華陰今屬陝西華州寰宇記云潼關即左傳晉侯使詹嘉守桃林之塞是也按潼關是自函谷至於潼關高出雲表幽谷祕邃深林茂木白日成昏

華山之陽

太華山在華陰縣南八里

鮮

許靳反與豐同

豆木豆籩竹豆

籩豆形制一同名以竹木而分也

生魄望後也

十六日爲哉生魄此言既生魄未知的爲何日故止以望後言之輯纂引陳氏曰諸家多謂生魄望後也而不察既字以望與既望例之則哉生魄十六日既

生魄十七日也其實十七日受命十九日丁未祀周廟簡倒耳

先王后稷武王追尊之也

追尊爲一代之始祖郊祀則以配天故謂爲先王無謚有謚者自文王起然親廟追尊爲王者止三世文王父也王季祖也太王曾祖也自組紺以上仍稱公故中庸曰上祀先公以天子之禮父加謚因稱文王祖無謚不容單稱王故以字配之以取別然字不可

加於爵上故稱王季曾祖亦無謚爲愈尊加太字稱太王也王業自太王起故追王始太王也

后稷始封於邠

寰宇記云武功縣古有邠國堯封后稷之地故釐與邠

同城在縣西南二十二里前漢爲釐縣後漢省入武

功武功縣今屬乾州乾州即唐奉天屬陝西奉元路

太王古公亶父也避狄去邠居岐

邠與豳同地志云扶風栒邑縣有豳鄉公劉所都今

有邠州屬陝西道岐今鳳翔府岐山縣也

詩曰居岐之陽實始翦商

詩魯頌閟宮之辭朱子云翦斷也太王自邠徙居岐陽四方之民咸歸往之於是王迹始著蓋有翦商之漸矣

至于文王克成厥功大受天命以撫安方夏自爲西伯專征而威德益著於天下凡九年崩

朱子語錄云問文王不稱王之說曰此事更要考說

文王不稱王固好但書中不合有惟九年大統未集
一句不知所謂九年者自甚時數起若謂文王固守
臣節不稱王則三分天下有其二亦爲不可又書言
太王肇基王迹則到太王時周家已自強盛矣今史
記於梁惠王三十七年書襄王元年而竹書紀年以
爲後元年想得當時文王之事亦類此故先儒皆以
爲自虞芮質厥成之後爲受命之元年也又云周自
積累以來其勢日大又當商家無道之時天下趨周

其勢自爾至於文王三分天下有其二以服事商孔子乃稱其至德若非文王亦須取了孔子稱至德只二人皆可爲而不爲者也又云文王之事惟孟子識之今按孟子集注云商紂之世文王三分天下有其二以服事殷至武王十三年乃伐紂而有天下張敬夫曰此事閒不容髮一日之閒天命未絕則是君臣當日命絕則爲獨夫然命之絕否何以知之人情而已諸侯不期而會者八百武王安得而止之哉

后土社也勾龍爲后土

左傳昭公二十九年蔡墨曰土正曰后土又曰共工氏有子曰勾龍爲后土后土爲社疏云即類于上帝宜于冢土故云后土社也

太祝云王過大山川則用事

周禮注云用事亦用祭事告行也

自相屠戮遂至血流漂杵

朱子書說云血流漂杵孟子說盡信書則不如無書

者只緣當時恁地戰鬪殘戮恐當時人以此爲口實
故說此然看上文自說前徒倒戈攻于後以北不是
武王殺他乃紂之人自蹂踐相殺荀子云所以殺之
者非周人也商人也

封比干墓

寰宇記在汲縣北十里後魏孝文太和中親幸其墳
刊石曰殷大夫比干之墓薛尚功古文法帖云唐開
元四年游子武於偃師耕耘獲一銅盤上有文云左

林右泉後岡前道萬世之寧茲焉是寶人以爲武王時物也考之即比干之墓

商容商之賢人

疏引帝王世紀云商容及殷民觀周軍之入見畢公至殷民曰是吾新君也容曰非也見太公至民曰是吾新君也容曰非也見周公至民曰是吾新君也容曰非也見武王至民曰是吾新君也容曰然聖人爲海內討惡見惡不怒見善不喜顏色相副是以知之

式車前橫木有所敬則俯而憑之

疏云男子立乘有所敬則俯而憑式遂以式爲敬名
賚予也武王賑窮賙乏

疏云紂所積之府倉名曰鹿臺鉅橋其義未聞寰宇
記云鹿臺在衛州衛縣西二十里帝王世紀云紂造
飾以美玉七年而成大三里高千仞餘址宛然衛縣
今廢

列爵惟五公侯伯子男也

愚按此列於邦國之爵也若朝廷之爵則公孤卿大夫士亦五等也

分土惟三公侯百里伯七十里男五十里之三等也愚按此亦頒於邦國之地也孟子云天子之卿受地視侯大夫受地視伯元士受地視子男亦三等也謂之內諸侯王制曰內諸侯祿也外諸侯嗣也又嘗考之孟子論諸侯地方之制雖諸家之通論而周禮大司徒獨異焉曰諸公之地封疆方五百里其食者半

諸侯之地封疆方四百里其食者參之一諸伯之地
封疆方三百里其食者參之一諸子之地封疆方二
百里其食者四之一諸男之地封疆方百里其食者
四之一鄭司農云其食者半所食租稅得其半耳其
半皆附庸小國也屬天子參之一亦然故魯頌曰錫
之山川土田附庸奄有龜蒙遂荒大東至于海邦論
語季氏將伐顓臾孔子曰先王以爲東蒙主且在邦
域之中矣是社稷之臣也此非百里之所能容然則

方五百里四百里合於魯頌論語之言諸男食者四之一適方五十里獨此與諸家說合耳愚按周禮成於武王崩後恐周公具此制度而未見之於施行也孟子又言周公之封於魯也爲方百里也伯禽既爲侯爵合受百里費誓亦言魯人三郊三遂計七萬五千家合百里萬井之數然以理推之方里而井井占八家百里萬井占八萬家豈魯國百里之地皆爲田井而略無山川城郭陂池園囿之所侵乎如以三分

去一除之則又不滿萬井之數而無以容三郊三遂之民而況可容泰山龜蒙之大乎其實田與地不同田則以百里七十里五十里爲限而地之封域則當如大司徒之制也王制曰天子之田方千里公侯田方百里伯七十里子男五十里是專以田爲率夫田非有千百里之地如棊枰之可布也但以田井計之耳八家共一井而爲方一里爲田九百畝也八百家共百井而爲方十里爲田九萬畝也八萬家共萬井

而爲方百里爲田九百萬畝也十井八十家出車一
乘百井出車十乘千井出車百乘萬井出車千乘故
公侯皆謂之千乘之國是蓋百里之田提封萬井也
大國三軍三鄉三遂三鄉爲正軍三遂爲副軍每鄉
萬二千五百家家出一人故一軍萬二千五百人也
其次國二軍小國一軍皆倣此愚故謂蔡氏所釋分
土惟三者以田論也論其疆域所包者不止此也
五教君臣父子夫婦兄弟長幼五典之教也

愚按長幼即兄弟誤重書而遺朋友當改正

喪以送死祭以追遠


中庸云父爲大夫子爲士葬以大夫祭以士父爲士子爲大夫葬以士祭以大夫期之喪達乎大夫三年之喪達乎天子父母之喪無貴賤一也此武王周公之事而重民喪祭之驗也

按劉氏王氏程子皆有改正次序

劉氏原父貢父王氏介甫朱子語錄云問先生近定

武成新本先生曰前輩定本更差一節王若曰一段或接于征伐商之下以爲誓師之辭或連受命于周之下以爲命諸侯之辭以爲誓師固是錯以爲命諸侯之辭者此去祭日只爭一兩日無緣有先誥命之理某看却諸侯來便教他助祭此是祭畢臨遣之辭當在大告武成之下比前輩只差此一節輯纂云近歲括蒼鮑氏復有定本謂古竹簡一行十有三字偶當句斷處差互四月至豐一節掇王若曰至萬姓悅

服在厥四月哉生明之前或以爲然愚按此說甚善
惜先儒不及見也



書蔡氏傳旁通卷四上

欽定四庫全書

經部

書傳彙通卷四中

詳校官給事中臣王鍾健

通政使司副使臣莫瞻菴覆勘

覆校官檢討臣盧應

校對官檢討臣郭寅

謄錄監生臣馬嗣仝

欽定四庫全書

書蔡氏傳旁通卷四中

元 陳師凱 撰

洪範

商曰祀周曰年此曰祀者因箕子之辭也箕子嘗言商其淪喪我罔爲臣僕史記亦載箕子陳洪範之後武王封於朝鮮而不臣也蓋箕子不可臣武王亦遂其志而不臣之也

唐孔氏曰此經文旨非直問答而已不是史官叙述

必是箕子既對武王之問退而自撰其事故孔傳特云箕子作之又云商曰祀周曰年此周書也秦誓稱年此獨稱祀此篇蓋箕子所作箕子商人故傳記引此篇書皆云商書是箕子所作明矣愚按左傳襄二
年云商書曰無偏無黨意夫子未定百篇之前此篇
雜商書中自經夫子之手然後定爲周書以繼武成
之後歟今觀箕子有不可臣之實預言罔爲臣僕一
也紀周之年而稱祀二也對武王不稱王而曰而曰

汝三也特以斯道之在已舍武王無可傳者不得已而授之此武王之問固難其辭而箕子之荅尤難其辭也武王之訪即孟子所謂不召之臣欲有謀焉則就之者新安陳氏曰箕子不臣周所以正萬世君臣之大法其陳洪範所以傳萬世天人之大法也歟

朝鮮

漢樂浪郡故朝鮮國也周秦時與中國絕武帝元封三年始開橐宇記云平州盧龍縣有朝鮮廢城即殷

箕子受封之地今平灤路盧龍縣也

彝常倫理也所謂秉彝人倫也

朱子詩傳云秉執也彝常也言天生衆民有是物必有是則蓋自百骸九竅五臟達之君臣父子夫婦長幼朋友無非物也而莫不有法焉如視之明聽之聰貌之恭言之順君臣有義父子有親之類是也是乃民所執之常性也愚按武王所問箕子所對其指彝倫蓋合一本萬殊之理言之天地之常經古今之通

義近而五常之性散而萬事萬物之所以然與其所當然者皆在其中矣蓋五行五紀在天之彝倫也五事八政三德在人之彝倫也皇極在君在民之彝倫也稽疑在事在物之彝倫也庶徵福極天人感應之彝倫也推之而彌滿六合卷之而退藏於密達之而亘古亘今一散爲萬萬會於一其大無外其小無內體用兼該顯微無間此其所以爲常理此其所以爲洪範歟

蓋曰洪範九疇原出於天鯀逆水性汨陳五行故帝震怒不以與之此彝倫之所以敗也

鯀治水九載不能順水之性而疏導之乃以土塞其下流夫水性潤下不得其性則必橫流逆決而爲害甚矣夫五行之序水居其首而土居其終當鯀之施工而水土墮塞是汨陳其五行也蓋水得其性地平天成然後木火相生金土呈露而稼穡以成焉今五行既亂則萬物失宜民生不遂舉凡彝倫之當然者

皆數敗而不叙矣夫以鯀之方命圯族數敗舜倫得
罪於天宜上帝之震怒也羽山之殛舜固誅之然舜
之誅之也可怒在彼已何與焉故鯀之殛理之所當
怒也理之當怒即上帝之所怒也然觀箕子之論謂
之舜倫攸數可言也謂之帝乃震怒亦可言也孰從
而知九疇之將畀而不畀哉蓋於禹而後知之也禹
使水火金木土穀惟修而畀九疇則汨陳五行者之
不得畀從可知矣雖然當陶唐之盛於變時雍之際

又何舜倫之數哉此無他非言朝廷也蓋言水患之甚爲民害也五行既汨九功未叙獸蹄鳥跡之道交於中國堯甚憂之此舜倫之所以數也豈必綱常絕滅而後謂之數哉

禹順水之性地平天成故天出書于洛禹別之以爲洪範九疇此舜倫之所以敘也舜倫之敘即九疇之所敘者也

孟子曰人性之善也猶水之就下也人無有不善水

無有不下故君子以人治人則治水者亦當順水之性也先天之位山澤通氣凡天下之水皆出於山而天下之山皆起於西北蓋艮居西北而兌居東南則天下之水必源發於西北之山而委趨於東南之澤者是水之性也天地定位去古未遠神聖繼作財成未備是以水之在地其躍也或激之其趨也或梗之當唐堯之際龍門未闢呂梁未鑿河出孟門之上泛濫衍溢懷山襄陵四海一壑仁人之所惡而帝堯之

所憂也。舜使禹治之。禹知水勢所激在龍門、吕梁之間，乃先經始壺口等處，以殺下流之勢。然後治梁及岐，鑿龍門，䟽底柱，使大河西來，盤東於山峽間，千數百里，不致橫流。逆決然後迤邐東行，各循其道。河水既定，餘川尚多。禹之施工，皆自下流䟽濬，其壅遏分別其枝派，故自冀而兗而青而徐，此自北而之東也。自徐而揚，荆由東而南也。自荆而豫，由南而至於中土也。自豫而梁，雍又由中土而後至西北也。蓋天下

地勢西北至高東南至下芒芒禹跡必先經理其下
流而後浚滌其泉源此所謂順水之性也豈若鯀之
墮塞汨亂之爲哉禹也能行其所無事以蓋前人之
愆善莫大焉且大哉乾元萬物資始至哉坤元萬物
資生天以陰陽五行化生萬物惟能生覆而不能成
載故盈天地之間者必麗乎土昔也洪水爲患莫不
昏墊今也水患既去地勢已平而天之所生者可以
成遂矣如六府孔修三事允治皆是也莫大於天地

使天不成而地不平天地亦無如之何也一禹之功
上極乎天而天已成下蟠乎地而地已平窮高極遠
而深厚莫測推而放諸四海而四海準垂之萬世而
永有所賴是則功侔造化道通神明固能使天不愛
道地不愛寶穹示效靈而川嶽貢珍者也昔者伏羲
在御龍馬已嘗負圖出河矣伏羲因之而畫八卦禹
之功業充塞天地而垂諸無窮者如此寧不有感而
致盛時之嘉瑞乎故洛水之涯天地之中也陰陽之

交也風雨之會也有神龜焉乃能於此負書而出許氏說文云書者如也又云著也蓋天地之理與數著見於此而又克如禹之志也伏羲仰觀俯察不待河圖而畫八卦而龍馬出河之數自合於先天之圖故謂之河圖大禹地平天成不待洛書而敘九疇而神龜出洛之數自合於洪範之書故謂之洛書箕子乃言天乃錫禹洪範九疇夫既非人力之可致也則不曰天錫而謂之何哉洪範之訓是爲大法彝倫之訓

是曰常理禹之所以爲大法者其存神過化亦已久矣於今而有覩於龜背之數自一至九是何神也天不言豈有世人之字以爲書哉特所具者數而已數之所存理之所寓也聖人以常理寓諸法天以常理寓諸數理同則道無不合矣是故禹也別龜之數敘吾之範龜有九數範有九類九類既彰萬理咸備故曰彝倫之叙即九疇之所叙者也九疇叙於聖人九數闡於洛龜倫既叙於疇而數壹寓於書故後世即

謂九疇六十五字爲洛書本文也吁是豈可以易言哉

世傳戴九履一左三右七二四爲肩六八爲足即洛書之數也

此據龜體記之戴九九數近首也履尾也近尾有一數也左三右七三近左脇七近右脇也二四爲肩二近前右足四近前左足也六八爲足六近右後足八近左後足也又有五數居正背此當補五數居中一

句始備本數嘗詳言之自一至九而五數居中五者數之宗也一者其始而九者其究也龜背之文分居九位而五爲之宗則五九者龜書之大數也自一至九積而計之凡四十有五則爲五者九爲九者五也然則九者九疇之所以分而五者又九疇之所宗也五不著則九不叙故汨陳五行則彛倫攸斁也何以言之道之大原出於天彛倫者天命之所付也天道之運莫過於五行五行者造化功用之原也在洛書

具五行之全數在洪範貫五行之宗旨其一六者水也二七者火也三八木也四九金也五居中土也此具五行之全數也一五行五氣運於天而五材生於地也二五事五行之發於人也五皇極五數之御於君也稽疑卜五事物吉凶之先見也八庶徵天人休咎之感應也此貫五行之宗旨也洪範九疇而貫五行者五位焉故初一曰五行而不言用無所往而不用也是孰有大於五行哉且九數之位崇陽抑陰一

爲陽之始故居下九爲陽之極故居上五爲陽之中
故居中三在五前爲陽中之陽故居左七在五後爲
陰中之陽故居右一三者水木之生數自北而東陽
生於子誠之通也九七者金火之成數自南而西陰
生於午誠之復也二四六八是爲陰偶分居四隅不
敢抗陽也六居一西八居三北四居九東二居七南
陰隨陽後各從其類也水一加火二爲三三加木三
爲六六加金四爲十十加土五爲十五十五則無以

復加矣故洛書一二三四五之積爲十五義畫以太
極兩儀四象八卦合之亦十五然洛書之十五陽之
積也義畫之十五陰之積也陽則周流而無窮陰則
一定而不易故洛書縱橫錯綜皆十五而爲十五者
有九以橫計之二九四四九二各爲十五一也七五
三三五七各爲十五二也六一八八一六各爲十五
三也以縱計之二七六六七二各爲十五四也九五
一一五九各爲十五五也四三八八三四各爲十五

六也以斜計之二五八八五二各爲十五七也四五
六六五四各爲十五八也以錯計之正之一三隅之
二四以及中五又虛中而七跨八九跨六各爲十五
九也愚故曰五九者龜書之大數也雖然十五之數
雖有九而其參五數者止五位其二九四六一八二
七六四三八則未嘗有五豈土居於中而不及四圍
乎曰不然一與四自爲五二與三亦爲五土固無所
不在也一六爲水數六退五即生一加五即成矣是

水之生成不離乎土也二七爲火數七退五即生二
加五即成矣是火之生成不離乎土也三八爲木數
八退五即生三加五即成矣是木之生成不離乎土
也四九爲金數九退五即生四加五即成矣是金之
生成不離乎土也土得一四亦生二三亦生合一二
三四爲十而後成也水火金木生於土之先成於土
之後土生於四者之後成於四者之先所謂土得一
四亦生二三亦生者一四合五金生水而金枯也二

三合五木生火而木燼也金枯木燼皆爲土矣洛書
無十數一二三四之積是爲十不待更著十也此洛
書所以具五行之全數而洪範所以貫五行之宗旨
也朱子易學啓蒙云河圖以五生數統五成數而同
處其方蓋揭其全以示人而道其常數之體也洛書
以四奇數統四偶數而各居其所蓋主於陽以統陰
而肇其變數之用也其皆以五居中者何也曰凡數
之始一陰一陽而已矣陽之象圓圓者徑一而圍三

陰之象方方者徑一而圍四圍三者以一爲一故參
其一陽而爲三圍四者以二爲一故兩其一陰而爲
二是所謂參天兩地者也三二之合則爲五矣此河
圖洛書之數所以皆以五居中也又云洛書以奇數
爲主故其中之所以爲五者亦具五奇數之象焉其
下一點天一之象也其左一點天三之象也其中一
點天五之象也其右一點天七之象也其上一點天
九之象也又云洛書之運行則水克火火克金金克

木木克土右旋一周而土復克水也又云洛書之縱橫十五而七八九六迭爲消長盈虛五分十而一合九二含八三含七四含六參伍錯綜無適而不遇其合焉此變化無窮之所以爲妙也又云聖人則河圖者虛其中則洛書者總其實洛書之實其一爲五行其二爲五事其三爲八政其四爲五紀其五爲皇極其六爲三德其七爲稽疑其八爲庶徵其九爲福極其位與數尤曉然矣又云洛書而虛其中五則亦太

極也奇偶各居二十則亦兩儀也一三三四含九八
七六縱橫十五而互爲七八九六則亦四象也四方
之正以爲乾坤離坎四隅之偏以爲兌震巽艮則亦
八卦也河圖一六爲水二七爲火三八爲木四九爲
金五十爲土則固洪範之五行而五十五者又九疇
之子目也是則洛書固可以爲易而河圖亦可以爲
範矣又安知圖之不爲書書之不爲圖也是其時雖
有先後數雖有多寡然其爲理則一而已但易乃伏

羲之所先得乎圖而初無待於書範則大禹之所獨
得乎書而未必追考於圖爾且以河圖而虛十則洛
書四十五之數也虛五則大衍五十之數也積五與
十則洛書縱橫十五之數也以五乘十以十乘五則
又皆大衍之數也洛書之五又自含五則得十而通
爲大衍之數也積五與十則得十五而通爲河圖之
數矣苟明乎此則橫斜曲直無所不通而河圖洛書
又豈有彼此先後之閒哉西山蔡氏云古今傳記自

孔安國劉向父子班固皆以爲河圖授羲洛書錫禹
關子明邵康節皆以十爲河圖九爲洛書蓋大傳既
陳天地五十有五之數洪範又明言天乃錫禹洪範
九疇而九宮之數戴九履一正龜背之象也惟劉牧
意見以九爲河圖十爲洛書託言出於希夷既與諸
儒不合並無明驗漢書劉歆云禹治洪水賜洛書法
而陳之九疇是也河圖洛書相爲經緯八卦九章相
爲表裏關子明云洛書之文九前一後三左七右四

前左二前右八後左六後右卅子曰方者土也畫州
井地之法其放於此乎方者洛書之文禹箕叙之而
作範也愚又按蔡氏撰皇極內篇數爲一書以爲易
更四聖而象已著範錫神禹而數不傳於是有範數
圖八十一章章八十一變共六千五百六十一變曰
洛書者數之原也余讀洪範而有感焉上稽天文下
察地理中參人物古今之變窮義理之精微究興亡
之徵兆微顯闡幽彛倫所叙秩然有天地萬物各得

其所之妙

此九疇之綱也

朱子語錄云此是箇大綱目天下之事其大者大槩
備於此矣又云此是人君爲治之心法周禮一書只
是箇八政而已又云洛書本文只有四十五點班固
云六十五字皆洛書本文古字畫恐自有模樣但今
無所考漢儒說此未是恐只是以義起之不是數如
此蓋皆以天道人事參互言之五行最急故第一五

事又參之於身故第二一身既修可推之於政故八
政次之政既成又驗之於天道故五紀次之又繼之
以皇極居五蓋能推五行敬五事厚八政修五紀乃
所以建極也六三德乃是權衡此皇極者也德既修
矣稽疑庶徵繼之者著其驗也又繼之以福極其善
惡之效至是不可加矣又云初一次二此讀豆也全
讀是以一二爲次第不見洛書本文又不見聖人法
象之義故後人至以此章總爲洛書本文皆爲句讀

不明也王太古見易云範疇有九合乎河圖之綱數

王氏以九數爲河圖範之子目五十五合乎洛書之目數

王氏以十

數爲洛書五行有五事有五政有八紀有五皇極居一德

有三卜五占二休徵五咎徵五福極共十一總五十

有五疇有九而五行不言用虛一者體猶太極也目

五十五而皇極不言數虛一者理猶太極也昔禹之

謨九功其六府以水火金木土穀爲序自上克下河

圖九宮之文也及敘九疇其五行以水火木金土爲

序依天一地二之次洛書五位之文也其序禹貢又
準洛書以北東南中西相生為序先冀州於北次兗
青徐於東水生木也又次揚荊於南木生火也又次
豫於中火生土也又次梁雍於西土生金也若此者
非規規求以合之也合乎理故合乎圖合乎書無往
而不合也

在天惟五行在人惟五事以五事參五行天人合矣
輯纂引真氏曰五行者天之所生以善乎人者也其

氣運於天而不息其材用於世而不匱其理則賦於人而爲五常以天道言莫大於此故居九疇之首五事天之所賦而具於人者貌之恭言之從視之明聽之聰思之睿皆形色中天性之本然也必以敬用之則能保其本然之性不以敬用之則貌必慢言必悖視聽則昏且塞思慮則粗且淺而本然之性喪矣五者治心治身之要以人事言莫切於此故居五行之次愚按以五事參五行者言人之貌言視聽思正與

天之水火木金土相配合也詳見本疇

八政者人之所以因乎天

一曰食主於稼穡必因春之發生夏之長茂秋之成
遂順天時而施人力然後稼穡可成焉二曰貨以五
金爲富必因天地之所產而人取以爲貨焉三曰祀
必因天地鬼神爲物之體而不可違故祭祀以報其
本焉四曰司空主平水土必因天時地利而使四民
各得其所焉五曰司徒教以人倫必因天叙天秩而

教民明善以復其初焉六曰司寇掌邦禁必因天討
有罪而施刑焉七曰賓必因天地之蕃毓而後嘉會
以合禮焉八曰師必恭行天罰以誅鋤暴亂焉此所
謂八政者人之所以因乎天也民以食爲天故以食
爲首而又曰農用焉

五紀者天之所以示乎人

天之爲象以日司晝以月司夜以星辰司位次南北
二極示人以樞機東西升沒示人以運動日月之會

示人以晦朔晝夜長短示人以寒暑周匝示人以蒼
歲中星之移示人以躔度斗杓之指示人以月建天
之所以示人者可謂至矣在乎人之所以推測而合
之耳故聖人制爲歷數之書詳步占之法以求其所
以合乎天者焉故曰五紀曰協所以合天也

皇極者君之所以建極也

皇者君也極者至極之義標準之名也人君中天下
而立定四海之民則當以一身爲四海之標準無所

不用其極使民皆仰望而取則焉故皇極曰建所以立極也

三德者治之所以應變也

聖人之德有常凡民之德則無常也無常則爲變惟聖人爲能隨其變而應之必至於治而後止故曰三德曰又所以治民也

稽疑者以人而聽於天也

人心不能無惑惟天可以爲人心之準天者理之所

由出也理明則惑祛矣然天不言理無跡聖人必假
著龜以前民用而使民聽命焉以爲之準故曰稽疑
曰明所以辨惑也

庶徵者推天而徵之人也

雨暘燠寒風五者皆天之所爲也人君必因而反之
於已以省吾所以感召之者如何蓋聖人無一時而
不戒無一事而不戒天人感應之機必有攸在也故
曰庶徵曰念所以省驗也

福極者人感而天應也

五福者人之所嚮也故因以爲勸六極者人之所畏也故因以爲懲人君而能建其有極則保佑命之自天申之凡民而能錫汝保極則惟天惠民惟辟奉天天人之閒有感必有應者如此夫

本之以五行敬之以五事厚之以八政協之以五紀皇極之所以建也又之以三德明之以稽疑驗之以庶徵勸懲之以福極皇極之所以行也

本之以五行則承天意以從事敬之以五事則身修而道立厚之以八政則萬事得其宜協之以五紀則四時得其序此皇極以之而立也又之以三德則俗化日以厚明之以稽疑則事理日以著驗之以庶徵則戒懼日以謹勸懲之以福極則善惡之效不可誣矣皇極之行其備於此矣

水火木金土者五行之生序也天一生水地二生火天三生木地四生金天五生土

太古王氏曰五行之生成以奇偶爲天地也以先後爲一二也太極渾然初無象數因氣成質先後可紀生之類水最先故曰一數奇而陽故曰天火之生次水故曰二數偶而陰故曰地木金土又次之故曰天三生木地四生金天五生土語其生則土最後蓋有水火木金而後土有以爲質語其成則土才具而四者皆因以成土又因四者之生以爲成本無六七八九十之序也原其生則有是先後之序耳生之者奇

則成之者偶生之者偶則成之者奇蓋獨陽獨陰不能以生成也夫所謂水最先者物靜而動氣以潛潤呵而雨啗而涎悲而泣愧而汗牝牡之交感果實之包含其初皆水也濕之氣鬱於陰則熱故火次之熱與濕相搏持則凝故木次之俄而堅強不挽故金又次之四者俱備相與沖和故土居其中故曰一水二火三木四金五土也水火木金非土不能以有成故生成之數水之一加於土五則爲六火之二加於土

五則爲七木之三加於土五則爲八金之四加於土
五則爲九土之五不待加五也以土加土如塗附塗
吾知其必不然矣然則土之成數曷爲而成十哉全
水火木金之生即土之成數蓋一二三四之積即十
數也愚按此論甚精可以發明九宮無十數也又蔡
傳引疏文微著爲次之說亦可與此互相發也

潤下炎上曲直從革稼穡

東齋集傳云潤下潤濕而下流炎上炎熱而上升曲

直謂生而曲與直從草謂可因可草種曰稼歛曰穡
作爲也鹹苦酸辛甘者五行之味也

輯纂引夏氏云五味必言作者水之發源未嘗鹹也
流而至海凝結既久而鹹之味成則鹹者潤下之所
作火之始然未嘗苦也炎炎不已焦灼既久而苦之
味成則苦者炎上之所作木之初生金之初鑛土之
始稼穡亦然

五行有聲色氣味

五行之聲水羽火徵木角金商土宮也五行之色水
黑火赤木青金白土黃也五行之氣水朽火焦木羶
金腥土香也

以性言也以德言也

潤下炎上曲直從革而謂之性者是就水火木金之
體而言蓋四者形而後有此氣質之性也稼穡而謂
之德者稼穡本言五穀五穀乃養人之具非言土之
爲體於土而有五穀之可稼可穡焉是土有此養人

之德也故不可以爲性也

貌言視聽思者五事之敘也

其次敘與五行同動容貌發言語視色聽聲思其所思皆人事也故謂之五事

貌澤水也言揚火也

精之潤澤者爲貌如水之浸潤故屬水氣之發揚者爲言如火之炎上故屬火又貌者精之榮也故爲水言者心之聲也故爲火

視散木也聽收金也

目內實而精散於色故屬木色之華彩者莫如木也
耳內虛而氣接於聲故屬金聲之遠聞者莫如金也
故木實則色茂眼實則視廣金虛則聲揚耳虛則聽
收

思通土也

心者一身之主宰萬事之本根也心者思之體思者
心之用五事之有思猶五行之有土也水火木金皆

不可無土貌言視聽皆不可無思故論語云貌思恭
言思忠視思明聽思聰思於貌言視聽無所不在故
土於水火木金亦無所不有故以思屬土也勉齋黃
氏云水貌雨太陰火言暘太陽木視煥少陽金聽寒
少陰土思風也通乎四者而不同焉

恭從明聰睿者五事之德也

德者所得之理所謂有物必有則也貌自得恭之理
言自得從之理目自得明之理耳自得聰之理思自

得審之理皆天性之本然人事之當然也

肅又哲謀聖五德之用也

恭從明聰審本得於天故爲德之體由是作肅作又
作哲作謀作聖則德之用也蓋貌本具恭之德而乃
不能作肅是有體而無用也用不行則體亦無自而
立苟貌而作肅言而作又視而作哲聽而作謀思而
作聖則恭從明聰審五者之德無不備於我而爲有
德之人矣顧在所以作之如何耳作字是用之行處

又按五事貌居其首蓋貌總一身其德主敬是敬又爲五德之原也故曰敬用五事如下文農用八政以食爲首故曰農用

食者民之所急貨者民之所資故食爲首而貨次之

愚按八政皆爲民而設故五事指名三事指官而不及冢宰宗伯司馬民莫急於食貨故首列之在周禮則食貨掌於天官祀掌於宗伯此分言食貨則不及統率百官之事獨言祀則不及朝廷禮樂之事司空

安居四民司徒教民五典司寇禁民姦慝皆切近民
事者賓如鄉飲鄉射之類周禮大行人掌大賓之禮
本屬司寇今析言之則不及朝覲會同之事師如五
人爲伍守望相助之類不言司馬則不及陳師鞠旅
之事蓋民生日用食貨既足然後修祀事定居室教
以孝悌禁其姦慝會賓友尚往來然後能親其上死
其長也治民之序固如是若主朝廷布政之職則有
不盡於此者禮樂大事而不舉焉愚固以八政皆爲

民而設也注疏亦云如鄭王之說自可皆舉官名何獨三事舉官也蓋八政主農而言非謂公家之事耳歲者序四時也

歲者天時之一周故正其歲在於序四時四時得其序而後歲功可成也

月者定晦朔也

歲統時時統月時有三月故三月爲天道小變之節不可差也在於定晦朔而已晦爲前月之終朔爲後

月之始每於日月所會之辰定之則十有二月不差矣

日者正躔度也

在天爲度在歲爲日躔者日行於度也天有三百六十五度四分度之一歲有三百六十五日四分日之一日行每與月會則爲一月一會之期二十九日四百九十九分十二會而成一歲則日行之度尚餘十日八百二十七分謂之閏餘積之三歲則置閏月以

貯之故日行惟在於正躔度躔度既正則日月之會
無先後之差而餘分之積免失閏之謬由是曰月曰
歲皆可協矣

星經星緯星

經星貼天不動凡內官外官二十八舍皆是也緯星
麗天而行如杼之緯帛水火木金土五星是也夜則
仰觀而識之後倚北極前定昏旦二中伺察五緯晨
夕遲疾順逆伏見孛流隕皆謹視之以奉天戒

辰日月所會十二次也

自玄枵至娵訾各有界限夜考中星知日月之行度以追計其所會而定晦朔弦望必於辰推之則歲月日皆可定矣詳見堯典

歷數者占步之法所以紀歲月日星辰也

史記太史公曰神農以前尚矣蓋黃帝考定星歷建立五行起消息正閏餘是謂五官各司其序顓頊受之乃命南正重司天北正黎司地堯立羲和之官明

時正度年者禪舜申戒文祖云天之歷數在爾躬舜亦以命禹由是觀之王者所重也夏正以正月殷正以十二月周正以十一月蓋三王之正若循環窮則返本天下有道則不失紀序無道則正朔不行於諸侯愚按占步之法歷代不同三代不可考矣後世作者莫善於唐一行大衍歷法其詳具載唐史今之授時尤精焉

皇君建立也極猶北極之極至極之義標準之名中立

而四方之所取正焉者也

朱子皇極辨曰洛書九數而五居中洪範九疇而皇極居五故自孔氏傳訓皇極爲大中而諸儒皆祖其說余獨以經之文義語脉求之而有以知其不然也蓋皇者君之稱也極者至極之義標準之名常在物之中央而四外望之以取正焉者也故以極爲在中之準的則可而便訓極爲中則不可若北辰之爲天極脊棟之爲屋極皆然而禮所謂民極詩所謂四方

之極者於皇極之義爲尤近顧今之說者既誤於此而并失於彼是以其說展轉迷謬而終不能以自明也即如舊說姑亦無問其他即經文而但讀皇爲大讀極爲中則夫所謂惟大作中大則受之爲何等語乎今以余說推之則人君以眇然之身履至尊之位四方輻輳面內而環觀之自東而望者不過此而西也自南而望者不過此而北也此天下之至中者也既居天下之至中則必有天下之絕德而後可以立

至極之標準故必順五行敬五事以修其身厚八政
協五紀以齊其政然後至極之標準卓然有以立乎
天下之至中使夫面內而環觀者莫不於是而取則
焉語其仁則極天下之仁而天下之爲仁者莫能加
也語其孝則極天下之孝而天下之爲孝者莫能尚
也是則所謂皇極者也由是而權之以三德審之以
卜筮驗其休咎於天考其禍福於人如挈裘領豈有
一毛之不順哉此洛書之數所以雖始於一終於九

而必以五居其中洪範之疇所以雖本於五行究於福極而必以皇極爲之主也

極者福之本福者極之效極之所建福之所集也人君集福於上非厚其身而已用敷其福以與庶民使人人觀感而化所謂敷錫也

朱子又云人君能建其極則爲五福之所聚而又有以使民觀感而化焉則是又能布此福以與其民也愚按極本於理福原於氣極建則福集者蓋理順而

氣亦順耳記曰福者備也備者百順之名也人君以
皇極爲訓而庶民行之則庶民亦受其福矣君人者
豈他有所謂福以付畀之哉

庶民與有位之人而無淫朋比德者惟人君爲之極而
使之有所取正耳

下文言有猷有爲有守此庶民之無淫朋者有能有
爲此正人之無比德者人民二字分言甚明諸說要
以蔡傳爲正新安陳氏曰作有扶植振起之意建立

作興大略相似不建不作則斯道廢墜矣

帝念哉之念

言人君於有猷有爲有守之人念之而不忘當如帝舜之念皋陶也

歸斯受之之受

言民有未合於善不陷於惡人君所當受之蓋如孟子所謂逃楊墨而歸儒者有可與爲善之機也故歸斯受之

見於外而有安和之色發於中而有好德之言汝於是則錫之以福而是人斯其惟皇之極矣

朱子又云夫人之有能草面從君而以好德自名則雖未必出於中心之實人君亦當因其自名而與之以善則是人者亦得以君爲極而勉其實也新安陳氏曰而康而色傳辨皆作民言孔氏謂汝當安汝顏色以謙下人兩而字皆指武王言假容色以俯就誘掖人則人心感發無隱於君曰我所好在德君則尤

當迎其善意而錫之福也蓋攸好德爲五福之一實福之本也愚按此說儘善而朱蔡並不從孔者蓋經文此一節本說庶民有此三等所當念之者是中人以上有可見之德者也所當受之者中人之資可與進德者也彼安和其色自謂好德者中人以下者也朱子所謂草面從君者謂如論篤是與君子者乎色莊者乎汝則錫之福者與其過而棄之寧若過而與之人君於此三等或念之而不忘或受之而不拒或

錫之而不吝則時人斯其惟皇之極而無不勉爲善
矣如孔氏之意止言念之受之兩等總以謙下之而
錫之福也如此則中人以下之資皆棄於聖人陶冶
之外矣下文尚言無虐癯獨況於草面而知以好德
自名者乎此朱蔡不從孔氏之旨也

癯獨庶民之至微者也高明有位之尊顯者也各指其
甚者而言

癯獨微賤無善可錄又出於上文三等之下人之所

易忽者也高明尊顯聞望久著又出於有能有爲之上人之所易畏者也於此無虐而無畏焉則抑揚予奪之間其必有道矣在三德之疇惟辟作福惟辟作威是也此一節兼言民人又以熒獨爲庶民之微者故以結上章之末高明爲有位之尊者故以冠下章之首也朱子辨中併下文至而邦其昌解之謂君之與民一視同仁凡有才能使皆進善則人才衆多而國賴以興也與蔡傳不同

此言有位者也

此亦分三段者第一段言在位而又有才智施設使羞其行則是嘉其已善而益進其後效也第二段言富則方穀貧則陷罪是中人在位者必養其恒心而後責其善行也第三段言無德而錫福者是謂用咎蓋爵罔及惡德之義也誠以列於庶位之人善惡有未易先知者必考其實而黜陟之也詳此民人兩章各分三節其論人君升降予奪之權既明且嚴誠

以居上御下威福在已一失其道則下不得所其將
何以建其有極而使民人皆錫汝保極哉又按其作
汝用咎朱子謂至於無好德之心而後始欲教之以
脩身勸之以求福則已無及於事而其起以報汝惟
有惡而無善矣蔡氏謂則爲汝用咎惡之人愚謂作
起也咎歸怨也如舉枉錯諸直則民不服之意謂於
無德之人若錫之福祿則人皆起而歸怨於汝矣
此章蓋詩之體所以使人吟詠而得其情性者也

性字下當補之正二字性與氣雜情與欲流未必皆
正故皇極之君以彛理爲訓惟欲使人得其情性之
正耳愚又按此章有戒辭有勸辭上六句用無字者
所謂戒之以私而懲創其邪思也下六句用王字者
所謂訓之以極而感發其善性也前言無偏陂好惡
禁止之意重後言無偏黨反側禁止之意輕蓋人慾
之萌能遏之於心則及其既發自然中節而無事禁
止之嚴矣方會其有極也必指其所當行者故曰遵

義遵道遵路遵而不失則自忘其傾邪狹小之念矣
及歸其有極也莫不識其正大之體故曰蕩蕩平平
正直如行者之赴家而自達於公平廣大之域矣始
而行道終而造道皆以人君爲標準而自求至極之
理於吾心也故在君曰建其有極在民曰會其有極
歸其有極所有者各有其有耳非人有之而已獨無
也又非得他人之所有以爲己有也合而來也各有
其有來而至也同有其有此皇極君民所以相與之

盛歟

與周禮太師教以六詩者同一機而尤要者也

春官太師云教六詩曰風曰賦曰比曰興曰雅曰頌
以六德爲之本以六律爲之音愚按太師教詩而本
之以六德是固可以融會性情而興起志意然三百
篇之多一言之要在思無邪而已曷若皇極之敷言
是彝是訓使人諷誦之間恍然而悟油然而得者故
比之六詩雖同一機括而尤爲切要者也

曰者民之辭也謂之父母者指其恩育而言親之之意
謂之王者指其君長而言尊之之意

凡民之所以有生者父母也父母有我合天地之氣
以成形具天地之理以成性然父母之所以恩育我
者其初惟能保此天地之氣而使形體之長茂爾其
賢不肖固未可必之於後日也有聖人焉繼天立極
是彝是訓能使天下之民皆有以明天地之理以全
其固有之性則其教誨式穀有父母之所不能備者

於是時也服膺皇極之訓親近天子之光皆曰生我者父母也而能備教育之恩者吾君又爲一父母也則其歡欣愛戴之私不極其歸往之辭不止也故曰以爲天下王夫自古未嘗一日無王也而得民之尊已者爲難惟以德行仁者而後天下以爲王也蓋生我者一家之父母也而建其有極者天下之父母也爲天下之父母則天下之赤子皆往歸之不謂之王而謂之何哉箕子之爲是言以天下之公義而推望

於武王者深矣

正直剛柔三德也

三德一疇須分君民之別然後義明

正者無邪直者無曲剛克柔克者威福予奪抑揚進退之用也

此三德之在君者所謂爲政以德德者出治之本也
人君道全德備剛柔正直各臻其極隨所遇而應之
爾

彊弗友者彊梗弗順者也。變友者和柔委順者也。沉潛者沉深潛退不及中者也。高明者高亢明爽過乎中者也。蓋習俗之偏氣稟之過者也。

此三德之在民者并正直爲三德。人君能建其有極故三德皆吉。凡民有氣稟之殊習俗之異故正直之德甚少而剛柔過不及之德甚多。皇極之化所以抑揚進退者皆欲過不及者之歸於正直也。

故平康正直無所事乎矯拂無爲而治是也。

正直即前所謂王道正直是也平康即前所謂無反
無側後所謂家用平康是也在下者無反側在上者
惟正直夫何爲哉恭已正南面而已矣

正直之用一剛柔之用四也

正直用之於平康剛柔用之於習俗之偏氣稟之過
者也習俗之偏言習於彊而偏於剛習於變而偏於
柔氣稟之過謂所稟沉潛而過於柔所稟高明而過
於剛

聖人撫世酬物因時制宜

平康強梗委弱有舉世而然有一家一國而然有一身一時而然聖人抑揚進退威福予奪所謂酬物制宜者也

三德又用陽以舒之陰以斂之

三德在君皆主於治民在民各從君所治民所習者剛或所稟者柔則君皆以剛克之民所習者柔或所稟者剛則君皆以柔克之陽以舒之者言變友柔克

沉潛剛克皆人君之所予也陰以斂之者言彊弗友
剛克高明柔克者皆人君之所抑也

執其兩端用其中於民所以納天下民俗於皇極者蓋
如此

兩端用中皆借說聖人稟中和之氣三德備具其爲
治也全體立於此而大用行於彼如鑑之照物妍媸
在彼隨物應之而已或以剛克或以柔克抑其過而
引其不及而卒化天下於平康所謂用其中於民也

兩端言剛柔也中言正直也聖人豈不欲天下之人皆正直而無所事乎矯拂哉不可必得故盡其撫世酬物因時制宜之妙會極歸極而終得以歸於聖人之天也故曰三德者治之所以應變也

福威者上之所以御下王食者下之所以奉上

前皇極傳云作好作惡好惡加人之意也此云作福作威亦以威福加人之意如可貴可賤可富可貧可生可殺之類孔傳云王食美食也釋文云珍食也

臣無有者戒其臣不可上僭也

禮始諸飲食蓋飲食乃日用之切身者凡臣下僭上
威福之外未有不玉食者故以切近者爲戒

頗不平也

頗普多反與無偏無陂同訓不平舊本作無偏無頗
唐玄宗以頗不協義字韻詔改爲陂事見郭忠恕佩
觿

大夫必害於而家諸侯必凶於而國有位者固側頗僻

而不安其分小民亦僭忒而踰越其常

而家而國與皇極疇而邦其昌好于而家同而字皆
訓汝彼而邦指周言此國字指侯國言大夫之家諸
侯之國而謂之而家而國者蓋王者一統天下諸侯
大夫不敢有其室雖寄治於諸侯大夫其實無非天
子之家國也天子不能作福作威而使權移於下是
自害汝家自凶汝國耳魯用天子之禮樂其流之弊
遂使李氏僭八佾三家僭雍徹陪臣執國命是其驗

也

龜曰卜著曰筮

輯纂引東齋集傳云龜歲久則靈著生百年一本百莖亦物之神靈者卜筮實問鬼神以著龜神靈之物故假之以驗其卦兆卜法以明火爇柴灼龜爲兆筮法以四十九著分掛揲扐凡十有八變而成卦又西山蔡氏云皇極之君以人謀未免乎有心有心未免乎有私此所以洗心齋戒以聽天命而無所容其心

也擇建立卜筮人者非其人則不可非其職則不專
必得其人而立之然後乃可命之卜筮定天下之吉
凶成天下之亹亹非細事也

雨者如雨其兆爲水霽者開霽其兆爲火蒙者蒙昧其
兆爲木驛者絡繹不屬其兆爲金克者交錯有相勝之
意其兆爲土

此五者雖無一二之次然立言自合五行之生序蓋
龜兆隨時而見不如五事有先後之倫也絡繹孔氏

作落驛疏云希疏之意愚按五兆蔡氏與孔氏所釋
大同但孔氏不知爲五行之兆耳又疏云今之用龜
其兆橫者爲土立者爲木斜向徑者爲金背徑者爲
火因兆而細曲者爲水不知與此五者同異如何又
史記龜策傳其兆有首仰首俛足開足音琴肸音琴橫吉
之類是漢太卜法其文雖存而今之學者亦罕通之
又周禮太卜掌三兆之法其經兆之體皆百有二十
其頌皆千有二百疏云體者謂龜之金木水火土五

兆之體經兆之體者名體爲經也占人云凡卜筮君
占體大夫占色史占墨卜人占坼注云體兆象也色
兆氣也墨兆廣也坼兆疊也體有吉凶色有善惡墨
有大小坼有微明尊者視兆象卑者以次詳其餘也
內卦爲貞外卦爲悔

朱子語錄云貞訓正事方正如此悔吝皆是事過後
方有內卦之占是事正如此外卦之占是已如此二
字有終始之意一貞八悔如重乾澤天夬火天大有

雷天大壯風天小畜水天需山天大畜地天泰內體是乾是一貞外體八卦是八悔餘倣此

左傳蠱之貞風其悔山是也

疏云僖十五年秦伯伐晉卜徒父筮之其卦遇蠱蠱卦巽下艮上說卦云巽爲風艮爲山其占蠱之貞風也其悔山也是內卦爲貞外卦爲悔也筮法爻從下起故以下體爲內上體爲外下體爲本因而重之故以下卦爲貞貞正也言下體是其正鄭元云悔之言

晦晦猶終也晦是月之終故以爲終言上體是其終也下體言正以見上體不正上體言終以見下體爲始二名互相明也

又有以遇卦爲貞之卦爲悔國語貞屯悔豫皆八是也

晉語云公子親筮之曰尚有晉國

韋昭云命筮之辭也

得貞屯

悔豫皆八也

韋昭云內曰貞外曰悔震在屯爲貞在豫爲悔八爲震兩陰爻在貞在悔皆不

利朱子啓蒙云三爻變則占本卦之彖辭而以本卦

爲貞之卦爲悔沙隨程氏曰晉公子重耳筮得國遇

貞屯悔豫皆八蓋初與四五凡三爻變也初與五用九變四用六變其不變者二三上在兩卦皆爲八故云皆八而司空季子曰皆利建侯

舊說卜有玉兆瓦兆原兆筮有連山歸藏周易者非是疏云言三人占是占此卜筮法當有三人周禮太卜掌三兆之法一曰玉兆二曰瓦兆三曰原兆掌三易之法一曰連山二曰歸藏三曰周易三法並卜法有一人故三人也又周禮疏云其形可占者其象似玉

瓦田之璽罇謂破而不相離也原原田也杜子春云
王兆帝顓頊之兆瓦兆帝堯之兆原兆有周之兆又
云連山伏羲歸藏黃帝鄭元云夏曰連山殷曰歸藏
皇甫謐云夏人因炎帝曰連山殷人因黃帝曰歸藏
西山蔡氏曰恐非是禹敘洛書之時未有原兆與周
易也

人一從而龜筮不違者亦吉

卜筮有六條第一是大同最吉第二是君從第三卿

士從第四庶民從此皆人一從而龜筮不違者爲次

吉

龜從筮逆則可作內不可作外

是第五條爲次凶

龜筮共違則可靜不可作

是第六條最凶

然有龜從筮逆而無筮從龜逆者龜尤聖人所重也故禮記大事卜小事筮傳謂筮短龜長是也

僖公四年左傳云晉獻公欲以驪姬爲夫人卜之不吉筮之吉公曰從筮卜人曰筮短龜長不如從長杜預注云物生而後有象象而後有滋滋而後有數龜象筮數故象長數短又朱子語錄云易占不用龜而每言著龜皆具此理也筮短龜長者謂龜惟鑽灼之易而筮有扞捺之煩龜之兆一灼便成亦有自然之易

雨屬水暘屬火燠屬木寒屬金風屬土

按朱子太極圖解水陰盛故爲雨火陽盛故爲暘木
陽穉故爲燠金陰穉故爲寒土沖氣故爲風此序亦
與五行生序同

漢志引狐突金寒之言

五行志貌之不恭時則有服妖引左傳閔公二年晉
獻公使太子申生帥師公衣之偏衣佩之金玦狐突
歎曰虓涼冬殺金寒玦離胡可恃也師古曰金行在
西是謂之寒輯纂引新安陳氏曰雨暘燠寒吳氏引

證其屬水火木金甚當風之屬土獨缺其證當如莊
子風生於土囊之口及大塊噫氣其名爲風證之風
爲土氣豈不章章明矣乎又孔氏疏云風土氣也凡
氣非風不行猶金木水火非土不處故土氣爲風葵
初王氏曰吳斗南以雨暘燠寒風屬水火木金土引
證甚明但風土無所證今以孔氏陳氏之說補之極
合造化愚按五事思曰睿睿作聖休徵曰聖時風若
蓋思無不通曰睿有八風宣暢之象

五行乃生數自然之序五事則本於五行庶徵則本於五事其條理次第相爲貫通

一曰水在事爲貌在徵爲雨二曰火在事爲言在徵爲暘三曰木在事爲視在徵爲燠四曰金在事爲聽在徵爲寒五曰土在事爲思在徵爲風皆自然之合也

在天爲五行在人爲五事五事修則休徵各以類應之五事失則咎徵各以類應之自然之應也然必曰某事

得則某休徵應某事失則某咎徵應則亦膠固不通而不足與語造化之妙矣

愚按蔡氏既曰五事修則休徵各以類應五事失則咎徵各以類應是其失得感應之條緒有不可紊者矣然又以膠固不通而不足與語造化之妙者是何言之相反也此無他蓋言理不可爽事不可泥以深懲漢儒穿鑿之弊以解後世之惑耳前言自然之應者以其理有不可爽故也後言膠固不通者以其事

有不可泥故也且經文明言念用庶徵又曰王省惟
歲且以五事之得失詳著其效驗如此是固人君之
所必當省念而克謹天戒者豈妄爲虛文以厚誣天
人哉朱子語錄云今人讀書竊心大膽如何看得古
人意思如說八庶徵這若不細心體識如何會見得
肅時雨若肅是恭肅便自有滋潤底意思所以便說
時雨順應之又時暘若又是整治便自有開明底意
思所以便說時暘順應之暫時燠若哲是昭融便自

有和暖底意思所以便說時燠順應之謀時寒若謀
是藏密便自有寒結底意思所以便說時寒順應之
聖時風若聖是通明便自有爽快底意思所以便說
時風順應之愚按漢儒以五行論災異正爲不知五
行五事皆有自然之序而恣爲穿鑿之說其言曰田
獵不宿飲食不享出入不節奪民農時及有姦謀則
木不曲直棄法律逐功臣殺太子以妾爲妻則火不
炎上治宮室飾臺榭內淫亂犯親戚侮父兄則稼穡

不成好攻戰輕百姓飾城郭侵邊境則金不從草簡
宗廟不禱祠廢祭祀逆天時則水不潤下貌之不恭
是謂不肅厥咎狂厥罰恒雨厥極惡時則有服妖時
則有龜孽時則有雞翫時則有下體生上之疴時則
有青眚青祥唯金沴木言之不從是謂不乂厥咎僭
厥罰恒暘厥極憂時則有詩妖時則有介蟲之孽時
則有犬豕時則有口舌之疴時則有白眚白祥惟木
沴金視之不明是謂不哲厥咎舒厥罰恒燠厥極疾

時則有草妖時則有羸蟲之孽時則有羊駝時則有
目疴時則有赤眚赤祥惟水沴火聽之不聰是謂不
謀厥罰恒寒厥極貧時則有鼓妖時則有魚孽時則
有豕駝時則有耳疴時則有黑眚黑祥惟火沴水思
心之不審是謂不聖厥咎霧厥罰恒風厥極凶短折
時則有脂夜之妖時則有華孽時則有牛駝時則有
心腹之疴時則有黃眚黃祥時則有金木水火沴土
皇之不極是謂不建厥咎眊厥罰恒陰厥極弱時則

有射妖時則有龍蛇之孽時則有馬駝時則有下人
伐上之疴時則有日月亂行星辰逆行唐孔氏曰洪
範本體與人主作法皆據人主爲說五行傳曰貌屬
木言屬金視屬火聽屬水思屬土五行傳伏生之書
也漢書五行志云河圖洛書相爲經緯八卦九章相
爲表裏昔殷道弛文王演周易周道敝孔子述春秋
則乾坤之陰陽效洪範之咎徵天人之道粲然著矣
漢興承秦滅學之後景武之世董仲舒治公羊春秋

始推陰陽爲儒者宗宣元之後劉向治穀梁春秋數其既福傳以洪範與仲舒錯至向子歆治左氏傳其於春秋意亦已乖矣言五行傳又頗不同是以與仲舒別向歆傳載眭孟夏侯勝京房谷永李尋之徒所陳行事迄於王莽舉十二世以傳春秋著於篇朱子語錄云伯謨云老蘇著洪範論不取五行傳而東坡以爲漢儒五行傳不可廢此亦自是既廢則後世有忽天之心先生曰漢儒也穿鑿如五事一事錯則皆

錯如何却云聽之不聰則某事應貌之不恭則某事
應西山蔡氏云君即五者之應以察吾五事之得失
一事得則五事從休徵無不應矣一事失則五事違
咎徵無不應矣鯀陞洪水水失其性爾而五行爲之
汨陳以是理也漢儒不得其意而事爲之說驗之於
古則鑿而不經推之將來則膠而不應又以福極強
配五行而以弱配皇之不極非鑿歟復齋董氏曰仲
舒劉向五行傳以五行五事皇極庶徵福極五者牽

合相從至於庶徵分配五福而六極衍其一則於咎
徵各增其一曰皇之不極厥咎眚厥罰常陰厥極弱
此則於箕文之外別立此以遷就其說其失箕子之
意遠矣愚謂洪範九章五行居首而其相貫者五事
庶徵而已漢儒分析六極甚無謂也蔡氏知其牽合
穿鑿泥於災異將以防人君之失而適以啓世主之
惑故深闢之而又以其理有不可爽者故以自然之
應論之可謂深切著明者矣今以經之成文事之定

理係其感應約爲條緒遵蔡氏之旨正漢儒之謬曰
天有五行散爲五氣順則時若逆則恒若人有五事
具爲五德修則徵休過則徵咎天人相應理氣存焉
大君受命欽若昊天建其有極惟謹厥德反躬克念
休咎靡忒天一生水水性潤下在事爲貌在氣爲雨
貌德爲恭貌澤爲水恭而作肅時雨順之弗念而狂
恒雨順之地二生火火性炎上在事爲言在氣爲暘
言德惟從言揚爲火從而作乂時暘順之弗念而僭

恒暘順之天三生木木性曲直在事爲視在氣爲煥
視德惟明視散爲木明而作哲時煥順之弗念而豫
恒煥順之地四生金金性從革在事爲聽在氣爲寒
聽德惟聰聽收爲金聰而作謀時寒順之弗念而急
恒寒順之天五生土土德稼穡在事爲思在氣爲風
思德惟睿思通爲土睿而作聖時風順之弗念而蒙
恒風順之人主一身示天下準財成輔相惟明克允
匪曰一動厥咎易彰匪曰一言厥休永臧誠之於思

視聽無違念茲庶徵內外兩持惟德惟至惟義惟極
居中御外孰曰罔克斂茲五福以錫萬邦永孚於休
外順內昌上帝降監保茲皇極於萬斯年爲民之式
王者之失得其徵以歲卿士之失得其徵以月師尹之
失得其徵以日

王者統卿士卿士統師尹如歲統月月統日故王者
之省念以歲計之卿士以月計之師尹以日計之職
任愈卑則省念愈詳師尹上之於卿士卿士上之於

天子天子反躬自省視吾之五事失得如何或有大旱淫雨愆陽伏陰之災關一歲之利害者王曰是吾之咎也一月之間陰陽不和卿士則曰是吾之咎也未及一月以日計之而亦爲災害者師尹則曰是吾之咎也蓋災害之大者則上屬於君其次則係於大臣其次則係於羣臣上下之間交相儆戒不敢有一豪忽天之心則必和氣致祥休慶輯集歲月日時無所變易而稼穡治功人才家國無不各順其宜矣其

或玩月愒日昏迷天象災眚荐至若罔聞知自下至上互爲欺蔽積日至月積月成歲師尹不致其憂卿士不疚其心天子不能反躬修德遂使日月至歲變其時若百度皆廢休咎所致有如此者可不謹哉

好風者箕星好雨者畢星漢志言軫星亦好雨

此雨字誤漢志

作風

漢天文志云箕星爲風東北之星也及巽在東南爲風風陽中之陰其星軫也月去中道移而東北入箕

若東南入軫則多風西方爲雨雨少陰之位也月失中道移而西入畢則多雨故詩云月離於畢俾滂沱矣言多雨也晉志亦言軫主風

日有中道中道者黃道也北至東井去極近南至牽牛去極遠東至角西至婁去極中日極南至於牽牛則爲冬至極北至於東井則爲夏至南北中東至角西至婁則爲春秋分

此皆據漢志文愚謂天體至圓非有界限爲日月五

星之道路也惟有經星綴天不動可借之以誌界限於是記取日所經歷之處周圍有二十八星名曰二十八舍又記取日行之路名曰黃道黃道貫穿二十八舍之間斜繞天腹一日行一周而不及天少許蓋天亦動日亦動皆自東而西天至健一晝夜一周而過一度初不知其爲一度也則見日行於內一晝夜恰一周而不及天所攙過者積三百六十五日四分日之一而日行恰退過一周遂即其所誌二十八舍

分爲三百六十五度四分度之一蓋以日一日不及
天少許之處爲一度地位也其黃道既斜繞天腹則
去北極自有遠近所謂北至東井去極近南至牽牛
去極遠者北至者夏至之時也南至者冬至之時也
東井本在南方朱鳥七宿中牽牛本在北方玄武七
宿中今以夏至日行在人間天北井度近於北極冬
至日行在人間天南牛度遠於北極故曰北至東井
去極近南至牽牛去極遠也東至角爲秋分日行所

退之處西至婁爲春分日行所退之處此云東西者則按天圖言之角在東方七宿婁在西方七宿也又非人間之東西也日至牽牛而爲冬至在東井而爲夏至在婁爲春分在角爲秋分此皆漢歷然也天運於外日行於內每歲有差至八十餘年則差一度唐一行謂堯時冬至日在虛一度及開元甲子却差三十六度自開元至於今又不同矣今則北至井四南至斗初東至軫二西至壁九與漢不同漢歷亦與周

初不同也而蔡氏引之者亦示人以歷法大槩使學者知日月之行所以有冬有夏者如此耳

月有九行九行者黑道二出黃道北赤道二出黃道南白道二出黃道西青道二出黃道東并黃道爲九行也立春春分從青道立秋秋分從白道立冬冬至從黑道立夏夏至從赤道

此亦據漢志文又按大衍歷云凡合朔所交冬在陰歷夏在陽歷月行青道

冬至夏至後青道半交在春分之宿當黃道東立冬立夏

後青道半交在立春之宿當黃
道東南至所衝之宿亦如之
冬在陽歷夏在陰歷

月行白道

冬至夏至後白道半交在秋分之宿當黃
道西立冬立夏後白道半交在立秋之宿

當黃道西北至所
衝之宿亦如之
春在陽歷秋在陰歷月行朱道
春分

秋分後朱道半交在夏至之宿當黃道南立春立秋
後朱道半交在立夏之宿當黃道西南至所衝之宿
亦如
春在陰歷秋在陽歷月行黑道
春分秋分後黑
道半交在冬至

之宿當黃道北立春立秋後黑道半交在立
冬之宿當黃道東北至所衝之宿亦如之
四序離

爲八節至陰陽之所交皆與黃道相會故月有九行
其去黃道六度凡日以赤道內爲陰外爲陽月以黃

道內爲陰外爲陽愚嘗思之月有九行合洛書九宮之數分爲八節合洛書八方之數每一節四十五日合洛書之目數五日爲一候九候爲一節合洛書九數皆以五爲宗也故五九四十五日也一節四十五日八節各三百六十日爲一朞之數也洛書縱橫十五故月十五日而望也一六配黑道三八配青道四九配朱道二七配白道五配黃道六爲老陰一合五亦爲六在北爲立冬冬至八爲少陰三合五亦爲八

在東爲立春春分九爲老陽四合五亦爲九在南爲
立夏夏至七爲少陽二合五亦爲七在西爲立秋秋
分

月行東北入于箕則多風月行西南入于畢則多雨

南字

衍文漢志
無南字

朱子語錄云問箕星好風畢星好雨曰箕是簸箕以
其簸揚而鼓風故月宿之則風古語云月宿箕風揚
沙畢是義網漉魚底義子亦謂之畢漉魚則其汁水

淋漓而下若雨然畢星名義蓋取此今畢星上有一柄下開兩义形象亦類畢故月宿之則雨漢書謂月行東北入箕若東南入軫則風者軫是東南方屬巽爲風所以好風恐未必然

五福六極在君則係於極之建不建在民則由於訓之行不行感應之理微矣


人君建其有極而民人會極歸極者所謂理一也福有五而極有六者所謂分殊也夫死生禍福貧富壽

天得於有生之初各有一定之分而不可移者今而嚮用五福所以勸善威用六極所以懲惡然則福極果出於人力而不謂命哉曰不然皇極之理與天爲一故栽者培之傾者覆之天之道也天者理之所自出也皇極既建是訓是行此天之所培也嚮用五福固有可致之理也背道滅德自暴自棄此天之所覆也威用六極固有可召之機其福極之本皆原於氣壽得氣之長富得氣之厚康寧得氣之安攸好德得

氣之純考終命得氣之正凶得氣之暴短折得氣之
促疾得氣之疵憂得氣之鬱貧得氣之薄惡得氣之
疹弱得氣之衰無非氣稟之所爲者然氣非理無所
主理無不善有生之後氣拘物蔽在乎善返其初與
否耳理順則氣順順則爲福蓋理之所至氣亦隨之
而化故曰禍福無不自已求之者皇極之君德盛仁
熟斂福於身推以爲訓而與民由之所謂錫福也其
或自外於聖人之天而無攸好德之實則鮮不陷於

六極矣雖然有常有變爲善致福爲惡致禍此常也盜跖之壽顏淵之夭此變也君子語常而不語變蓋惟於吾心之天求之輯纂董氏曰自初一日五行至威用六極禹之本文九疇之經也自一五行至篇終箕子之敘論九疇之傳也先經以明其綱後傳以詳其目洪範可得而讀矣蓋天地之所以爲造化者陰陽五行而已聖人不能違也天地以其氣生育民物而理行乎其中聖人以其理修己治人而氣參乎上

大抵一二三四皆經常之疇法天以治乎人者也六
七八九皆權變之疇即人以驗諸天者也而五皇極
一疇則守常制變之主與天爲徒爲民之則者也洪
範法之大不出九疇外則彝倫道之常即在九疇中
矣舍是何以敘彝倫哉



書蔡氏傳旁通卷四中

欽定四庫全書

經部

書傳旁通卷五

詳校官給事中_臣王鍾健

通政使司副使_臣莫瞻菴覆勘

覆校官檢討_臣盧應

校對官檢討_臣郭寅

謄錄監生_臣萬在衡

欽定四庫全書

書蔡氏傳旁通卷四下

元 陳師凱 撰

旅獒

九夷八蠻多之稱也職方言四夷八蠻爾雅言九夷八蠻但言其非一而已

周禮注云東方曰夷南方曰蠻四八周之所服國數也爾雅注疏云東夷有九種一曰玄菟二曰樂浪三曰高驪四曰蒲飾五曰鳧夷六曰索豕七曰東屠八

曰倭人九曰天鄙八蠻者李巡云一曰天竺二曰咳
首三曰焦僂四曰跛踵五曰穿胷六曰僖耳七曰狗
軹八曰旁春

武王克商之後威德廣被九州之外蠻夷戎狄莫不梯
山航海而至

按汲冢周書王會篇所載蠻夷戎狄所獻有曰稷慎
文壁曰穢人前兒曰良夷在子曰揚州禺魚曰發人
鹿人曰俞人雖馬曰青丘狐九尾曰周頭抵輝曰黑

齒白鹿白馬曰白民黃乘曰東越海蜃曰甌人蟬蛇
曰於越納曰姊妹珍曰且甌文蜃曰共人元貝曰海
陽大蟹曰自深桂曰會稽蠶曰義渠茲白曰央林尊
耳曰唐戎閭曰渠叟鼯犬曰樓煩星施曰卜盧以牛
曰區陽鼈封曰規矩麟曰西申鳳鳥曰氐羌鸞鳥曰
巴人比翼鳥曰方煬皇鳥曰蜀人文翰曰方人孔鳥
曰卜人丹砂曰夷閭木曰康民桴苾曰州靡費費曰
都郭生生欺羽曰奇幹善芳曰高夷噉羊曰獨鹿邛

邛距虛曰孤竹距虛曰不令支元獫曰不屠何青熊
曰東胡黃羆曰山戎戎菽曰般吾白虎曰屠州黑豹
曰禺氏駒駟曰大夏茲白牛曰犬戎古皇之乘曰楚
數每牛曰句奴狡曰權扶玉自曰白州比閭曰禽人
管曰路人大竹曰長沙鼈曰魚復鼓鍾鍾牛曰蠻楊
之翟曰倉吾翡翠正義所謂王會備焉者此也

犬高四尺曰獒

据爾雅

公羊傳曰晉靈公欲殺趙盾盾踳階而走

見宣公六年踳丑略反何休注云踳猶趨遽不暇以次

太保召公奭也史記云與周同姓姬氏

史記註譙周云周之支族食邑於召索隱云召者畿內采地或者謂文王取岐周故墟召地分爵二公故詩有周召二南言皆在岐山之陽故言南也後武王封之北燕以元子就封而次子留周室代為召公至

宣王時邵康公虎其後也

謹德蓋一篇之綱領

新安陳氏云一篇皆自明王慎德一句推廣之曰昭德之致曰惟德其物曰德盛不狎侮曰玩人喪德曰終累大德德之一辭諄諄焉惟慎德所以自能致貢物惟所貢無異物所以見其慎德若奇玩之物非所當獻亦非所當受一受之則荒怠之心生而慎德之意失矣

其所貢獻惟服食器用而已無異物也

正義云玄纁絺紵供服也橘柚菁茅供食也羽毛齒革瑤琨篠簜供器用也

如分陳以肅慎氏之矢

魯語云仲尼在陳有隼集于陳侯之庭而死楷矢貫之石砮其長尺有咫陳惠公使人以隼如仲尼之館問之仲尼曰隼之來也遠矣此肅慎氏之矢也昔武王克商通道于九夷百蠻使各以其方物來貢使無

忘職業於是肅慎氏貢楛矢石砮其長尺有咫先王
欲昭其令德之致遠也以示後人使永監焉故銘其
楛曰肅慎氏之貢矢以分太姬配虞胡公而封諸陳
古者分同姓以珍玉展親也分異姓以遠方之職貢
使無忘服也故分陳以肅慎氏之貢君若使有司求
諸故府其可得也使求之得之金櫝如之

分魯以夏后氏之璜之類

左定四年衛子魚曰昔武王克商成王定之選建明

德以藩屏周故周公相王室以尹天下於周為睦分
魯以大路大旂夏后氏之璜封父之繁弱殷民六族
分康叔以大路少帛綉棨旃大吕殷民七族分唐
叔以大路密須之鼓闕鞞甲名也沽洗懷姓九宗職官
五正

不役於耳目之所好

不為聲色所役也心箴云心為形役乃獸乃禽

周穆王得白狐白鹿而荒服因以不至

狐當作狼

史記穆王將征犬戎祭公謀父諫王遂征之得四白狼四白鹿以歸自是荒服者不至

以武王之聖召公所以警戒之者如此

董氏曰聖人不以細行而不謹大臣不以細過而不諫此古之所以君明臣良而後世鮮儷也漢文帝無太保之訓而却千里馬其賢矣哉

金滕

藏於金滕之匱

王日休曰滕緘也以金緘封若金鎖然鄭氏曰凡藏
秘書皆然非始周公

築土曰壇除地曰墠

築土封土也除地平地也鄭元云時為壇墠於豐壇
墠之處猶存焉

詩言圭璧既卒

雲漢之辭既卒既盡用也

周禮裸圭以祀先王先公

冬官玉人云裸圭尺有二寸有瓚以祀廟瓚如盤其柄為圭也林氏云植璧於壇秉圭於手愚案裸圭有瓚非所秉者所秉於手者乃桓圭信圭躬圭耳當如雲漢總為禮神之玉若為所秉於手者則非裸圭也故孔註以為周公秉桓圭以為贄蔡氏雖以為裸圭而遂不容解秉字要之周公當時亦無酌酒降神之事當依古註為是

若爾三王是有丕子之責于天蓋武王為天元子三王

當任其保護之責于天不可令其死也于天之下疑有闕文舊說謂天責取武王者非是

新安陳氏曰蔡氏謂任保護之責于天未然惟不用師說所以疑于天之下有缺文朱子語錄云此一段先儒都解錯了只有晁以道說得好他解丕子之責如史傳中責其侍子之責蓋云上帝責三王之侍子侍子指武王也上帝責其來服事左右故周公乞代其死言三王若有侍子之責于天則不如以我代之

我多材多藝能事上帝武王不若旦多材多藝不能
事鬼神不如且留他在世上定你之子孫與四方之
民文意如此

周公忠誠切至欲代其死以輸危急

林氏曰旦多材多藝元孫之死不若旦之死元孫能畏
服四方則旦之生不若元孫之生

習重也謂三龜之兆一同開籥見卜兆之書乃并是吉
蔡氏及古註皆不明指是字為何物所并者何兆愚

竊謂以三龜卜之見兩兆皆吉故云一習吉及啟籥見書乃云并此兆亦吉也

體兆之體也

薛氏曰體與詩爾卜爾筮體無咎言之體同周禮占人云凡卜君占體大夫占色史占墨卜人占拆然證以詩之語則卜看兆體亦可通上下言之

翼日公歸之明日也瘳愈也

林氏曰請代武王之死者周公之本心也王瘳而公

不死者天也非人之所能為也

孺子成王也

按稽古錄武王克商七年而崩子成王誦立成王年十三周公為冢宰攝行天子事據此則武王克商二年病時成王僅八歲故不知卜事至此十三歲而即位聞流言周公居東二年則成王已十五歲所謂五尺童子也故稱孺子沖子自成王即位至周公復辟時凡七年而成王二十歲所謂六尺之孤也

流言無根之言如水之流自彼而至此也

詩疏云流謂水流造作虛言使人傳之如水之流然辟讀為避鄭氏詩傳言周公以管蔡流言辟居東都是也

見七月詩序下詩疏云居東者出處東國待罪以需王之察已是說避居之意也周公避居東都史傳更

無其事古者避辟

扶亦反

譬辟皆作辟字而借聲為義

鄭讀辟為避故為此說○朱子與蔡仲默書云弗辟

之說只從鄭氏為是向董叔重得書亦辨此一條一時信筆答之謂當從古註說後來思之不然是時三叔方流言於國周公處兄弟骨肉之間豈應以片言半語便遽然興師以誅之聖人氣象大不如此又成王方疑周公周公固不應不請而自誅之若請於王王亦未必見從則當時事勢亦未必然雖曰聖人之心公平正大區區嫌疑似不必避但舜避堯之子於南河之南禹避舜之子於陽城自是合如此若居堯

之宮逼堯之子即為篡矣又謂成王疑周公故周公居東不幸成王終不悟不知周公如何處愚謂周公亦惟盡其忠誠而已

鴟鵂惡鳥也以其破巢取卵比武庚之敗管蔡及王室也

嚴氏詩緝云鴟鵂惡聲之鷩鳥喜破鳥巢而食其子託為鳥之愛其巢者呼鴟鵂而告之曰汝先已取我子食之矣無更毀我巢也喻為惡者既陷管蔡於罪

矣無更謀危王室也恩愛勤勞鬻養此子誠可傷憫
今既取之其毒甚矣况又毀我巢乎程子曰鴟鵂謂
為惡者子喻管蔡室喻王室呂氏曰殷民流言中傷
周公謀危王室故周公曰管蔡親也爾既以惡污染
使陷於罪是害我兄弟矣又欲謀危王室則不可也
誚讓也

讓責也呂氏曰王欲誚公而未敢所謂未敢則悔過
之根本也

新當作親

案陸氏釋文云新逆馬本作親逆

大誥

三叔懼遂與武庚叛

東齋陳氏曰武王以公義封武庚而不虞其怨以親
愛用三叔而不料其反仁人之過也使舍武庚而立
微子三監雖欲叛而不從舍三叔而任他人武庚雖
欲反而不敢朱子語錄云當初紂之暴虐天下之人

胥怨無不欲誅之及武王既奉天下之心以誅紂於是天下之怨皆解而歸德於周矣然商之遺民及與紂同事之臣一旦見故主遭人戮宗社為墟寧不動心茲固叛心之所由生也蓋始於苦紂之暴而欲其亡固人之心及紂既死則怨已解而人心復有所不忍亦事勢人情之必然者又况商之流風善政畢竟尚有在人心者及其頑民感商恩意之深此其所以叛也後來樂毅伐齊亦如此

紹介天明以定吉凶

韻會云紹介行也謂行人之副也書疏云天道玄遠
龜是神靈能傳天意以示吉凶故疑則卜之以繼天
明道林氏曰天之吉凶示人甚明然其道幽冥無介
紹以傳其意惟卜之以龜則天之明曉可見

反鄙邑我周邦

左傳宣十四年宋華元曰過我而不假道鄙我也鄙
我亡也杜預云以我比其邊鄙是與亡國同

微子之命

成王既殺武庚封微子於宋以奉湯祀

林氏曰不曰宋公之命而曰微子之命蓋周以賓待之非欲臣之也吳氏曰武王克殷封武庚於殷墟封微子於宋樂記曰武王下車投殷後於宋是也及武庚叛成王殺之始即微子已封之宋國建之為上公以奉湯祀蓋申命之書非先未封至此始封也史記世家言周公既承王命誅武庚乃命微子代殷後奉

先祀作微子之命以申之其說為是且武王猶封箕子於朝鮮豈有捨微子不封待成王而後封乎新安陳氏曰殺武庚始命微子奉湯祀者蓋紂以嫡子立為天子武庚紂子實為大宗子微子不過支子耳武庚在為殷後奉湯祀者武庚也微子不得與也武庚死殷命黜微子始得代之為殷後歟

微子帝乙之長子紂之庶兄也

正義曰呂氏春秋仲冬紀云紂之母生微子啟與仲

衍尚為妾已而為妻後生紂紂父欲立啟為太子太史據法而爭之曰有妻之子不可立妾之子故紂為後鄭云微子啟紂同母庶兄也

宋亳在東故曰東夏

自豐鎬言之則宋在東宋國即隋之宋州唐之睢陽郡宋升應天府今為歸德府屬河南即高辛氏閼伯所居商丘也有微子墓

服命上公服命也

周禮典命云上公九命為伯其國家宮室車旗衣服
禮儀皆以九為節司服云公之服自衮冕而下如王
之服

康誥

武王誥命為衛侯

朱子語錄云五峯胡氏於皇王大紀考究得康誥非
周公成王時乃武王時蓋有朕其弟之語若成王則
康叔為叔父矣又首尾只稱文考成王周公必不只

稱文考又有寡兄之語亦是武王自稱無疑如今人稱劣兄之類又唐叔得禾傳記所載成王先封唐叔後封康叔無姪先叔之理

武王分封之時年已九十

武王年九十三而終克商後七年而崩則克商時已八十六歲及至分封則近九十矣

衛康叔封布茲

徐廣曰茲者籍席之名諸侯病曰負茲索隱曰茲一

作莛公明草也言茲舉成器言莛見潔草也

三月周公攝政七年之三月也始生魄十六日也蘇氏曰此洛誥之文當在周公拜手稽首之上

新安陳氏曰初基定基址也鎬在西洛在東故曰東國洛見士朝見而趨事也民大和會人心本自和也播民和因人心之和而播敷宣暢其和也悅以使民民忘其勞公不忘民之勞而勤勞之所以得民心也以召誥考之周公以三月十二日乙卯至洛先觀召

公營洛規模十四日丁巳行郊禮十五日戊午行社
禮十六日己未初基作洛繼此五日內號召齊集計
度區畫分配科派至二十一日甲子朝乃用書命庶
殷諸侯丕作召誥所謂用書命丕作即此所謂洪大
誥治也如召誥傳中引春秋傳云云之類參以召誥
日月脗合洛誥冠以此九句方有頭緒強附之此全
不相應其為洛誥脫簡何可疑者諸家阿附牽強解
之非矣

孟長也言為諸侯之長

吳氏曰詩序言衛不能修方伯連率之職康叔之為方伯無疑

明德慎罰一篇之綱領

林氏曰案蘇忿生以溫為司寇立政司寇蘇公是也
又定四年云武王之母弟八人康叔為司寇則康叔
以衛侯入繼蘇公為之故并以詰姦刑暴之事告之
臬法也為準限之義

東齋陳氏曰梟門梱也有限準之義故以訓法猶謂法為律也愚案律即黃鐘十二律也毫釐不可差刑法亦然故稱法為律

呂氏曰外事衛國事也史記言康叔為周司寇職任內事故以衛國對言為外事云云異時成王或舉以任司寇之職而此未必然也

新安陳氏曰左傳定公四年有曰武王之母弟八人周公為大宰康叔為司寇則康叔以諸侯入為王朝

之卿明矣為司寇與即衛封兩不相妨往来乎朝廷
邦國之間何往不可呂氏內事外事之說極當蔡氏
何必疑之而乃添出異時成王或舉以任司寇之職
一句適以助後世成王封康叔之說何也權用殷罰
有倫者正是初得天下初分封時事若是後來何必
師用殷罰為哉味此語愈見得此為武王之書也
要囚獄辭之要者也

東齋陳氏曰要者結罪之辭要囚謂結定其囚之罪

也蔽要囚謂斷其所結定之囚猶今世引斷也今世
大辟囚已結罪後猶有審覆經年者

顛越人

疏云謂不死而傷

戛法也

新安陳氏曰蔡訓戛為法未見所本愚案釋詁以典
舜法則律戛皆訓常郭註云皆謂常法耳疏引不率
大戛蔡氏蓋据此也

酒誥

妹邦即詩所謂沫鄉

孔氏曰妹地紂所都朝歌以北是薛氏曰妹古沫字
水名因水名地愚案古文水名多從女如媯水姜水
是也毛詩傳云沫衛邑也

穆敬也詩曰穆穆文王是也或曰文王世次為穆亦通
新安陳氏曰案昭穆之穆與左傳合不易之論以穆
考為穆穆之穆則詩稱武王曰率見昭考此昭字又

如何訓耶穆穆之證非也

天始令民作酒

疏云世本云儀狄造酒又云杜康造酒本人以意為之今言天降命蓋人為亦天之所使也

酒之禍人也而以為天降威者禍亂之成是亦天耳

新安陳氏曰天降命與天降威當對觀設酒之初意本為祭祀乃天之降命也酒之流生禍亦天之降威也酒一而已用以祀者此酒也喪德喪邦者亦此酒

也天理人欲同行異情人之於酒知其祭祀而本於降命之天又能於燕飲而凜然知有降威之天則天理行而人欲窒方無酒禍矣史氏漸曰吾切喜衛人何其服酒誥之訓世守於無窮也始也商俗淫酒武王以酒誥戒之逮幽王之世上下沈湎衛武公作賓之初筵以見衛人非特一時聞訓不敢自越於禁防又能以其所以為禁防者傳為子孫法焉

肇敏

葵初王氏曰肇訓敏未可曉愚案釋言云肇敏也郭云肇牽車牛蔡氏正据此而葵初妄譏甚矣學不可不博

汝當用力戒謹殷之賢臣與鄰國之侯甸男衛使之不洩于酒

林氏曰康叔為諸侯長故劄必及侯甸男衛

太史掌六典八法八則內史掌八柄之法

太史內史在周官為宗伯屬而六典八法八則則冢

宰所建以治百官而太史又建六典以為王逆邦國
之治掌法以逆官府之治掌則以逆都鄙之治太宰
既以八柄詔王內史又居中貳之以詔王治六典治
典教典禮典政典刑典事典也八法官屬官職官聯
官常官成官法官刑官計也八則祭祀法則廢置祿
位賦貢禮俗刑賞田役也八柄曰爵曰祿曰予曰置
曰生曰奪曰廢曰誅也薛氏曰二史掌邦法在王朝
則貳冢宰在侯國則居賓友之地陳氏傳良曰諸侯

有太史無內史內史惟天子有之內史是商之故臣
康叔所當親之為友者也愚案此章冠之以汝劓毖
殷獻臣當如陳氏說

位三卿者

大國三卿也

圻父政官司馬也主封圻

圻詩作祈毛云祈父司馬也職掌封圻之兵甲釋文
云封圻當作畿古作祈圻畿同大司馬云制畿封國

以正邦國

農父教官司徒也主農

大司徒云以土會之法辨五地之物生以土宜之法
辨十有二土之名物以任土事辨十有二壤之物而
知其種以教稼穡樹藝以土均之法辨五物九等制
天下之地征乃經土地而井牧其田野凡此皆農事
既富而後教先王之政也

宏父事官司空也主廓地居民

周官云司空掌邦土居四民時地利正義云諸侯三卿以上有司馬司徒故知宏父是司空宏大也言大父者以營造為廣大國家之父

羣飲蓋亦當時之法其詳不可得而聞矣

史記註云漢律三人已上無故羣飲罰金故賜酺得會聚飲食酒誥羣飲之執其類此歟

梓材

大家孔氏曰卿大夫及都家也

正義云卿大夫在朝者都家亦卿大夫所得邑也又公邑而大夫所治亦是也愚案定四年云分康叔殷民七族陶氏施氏繁音婆氏錡氏樊氏饑氏終葵氏即衛之大家也

律所謂知情藏匿貲給

三者皆因罪人所歷過或知情或藏匿或貲給之貲當作資以貲資之也

漢律所謂疵也

痕說文云毆傷也諸氏切

此章文多未詳

新安胡氏曰蔡傳僅訓字而云多未詳信當缺之愚以意解之云汝若常言及曰我固有官師為師三卿及正官之長及衆大夫然必自曰我不可厲虐殺人亦以為人上者當率先恭敬勞來故在下者無往而不恭敬勞來矣惟其有欽恤之心勞來之意其用刑也故於往日為姦為宄或殺人或歷人皆宥之故亦

於見其君事而有毀傷人者亦宥之往日紂在時也
見厥君事亦紂事也蓋商紂之時其民多有為惡者
康叔於此不當追咎於既往而與之更新可也

康叔所封亦受畿內之民當時亦謂之監

受紂也非授受之受東齊陳氏曰康叔孟侯故稱之
為監

敷菑廣去草棘也

敷廣也爾雅云田一歲曰菑郭璞云江東呼初耕地

反草為菑

畎通水渠也

周禮匠人為溝洫廣尺深尺曰畎

塗墍泥飾也

說文云墍仰塗也

茨蓋也

穀梁傳註云茨謂茅蓋屋也

梓良材

梓木名

腹采色之名

正義云腹是采色之名有青色者有朱色者鄭玄引山海經云青丘之山多有青腹此經知是朱者與丹連文故也

樸斲以喻制度

陳東齋云具粗曰樸致巧曰斲

肆今也

新安陳氏曰蔡氏訓肆為今未安愚案釋詁云肆故
今也郭云肆既為故又為今今亦為故故亦為今蔡
氏正據此陳氏未考耳

監視也此人臣祈君永命之辭也案梓材有自古王若
茲監罔攸辟之語而編書誤以監為句讀而爛簡適有
已若茲監之語以為意類合為一篇而不知其句讀之
本不同文義之本不類也

新安陳氏曰已若茲監與自古王若茲監相似而實

不同上文之監平聲三監之監此之監去聲監觀之
監已乎君其監觀于茲臣所祈於君惟曰欲自今至
于萬年當為天下王王之子子孫孫永保民而已其
人臣祈君永命忠愛無窮之心歟

書蔡氏傳旁通卷四下